

## REGIONAL NEWS

HEADLINES:-

1. Khawzawl khawtlangin hnatlanga Sapsakei Lamlian kawngpui an thenfaina leivungin National Highway-06 a hnawh mek chu vawiin khan Khawzawl Bawrsap Pu K. Lalrohlua'n a hmunah a enfiah.
2. African Swine Fever avanga vawk thi tawh zat vawiin thlenga chhinchhiah chu 816 a tling tawh .
3. Lok Sabha inthlanpui thawh ngana atana campaign chu vawiin tlai khan a tawp a. Thawhtanni khian vote thlak a ni ang
4. Kyrgystan khawpui Bishkek-ah ramdangmite bituma mipui tharum thawhna thlen avangin India chuan zirlaite fimkhura mahni inchhunga tawmim turin a chah

&lt;&gt;&lt;&gt;&lt;&gt;

KHAWZAWL DC VISITS BLOCKED NH-06

Khawzawl khawtlangin hnatlanga Sapsakei Lamlian kawngpui an thenfaina leivungin National Highway-06 a hnawh mek chu Champhai South Bialtu MLA, Lt. Col. Clement Lalhmingthanga'n a ngen angin tukin khan Khawzawl Bawrsap Pu K. Lalrohlua'n a hmunah a enfiah a. He hunah hian Khawzawl SP Pu Lalchhuanthanga leh Khawzawl Vengthar khawtlang hruaitute pawh an tel.

Bawrsap hian NHIDCL leh kawngpui enkawltu Company, Shri Balaji Construction Company (SBCC) aiawhte a ko a. SBCC-ah hian thutlukna siam thei he laiah an awm loh avangin Executive Director, NHIDCL hnenah a tul anga hmarawn la turin lehkha a ziak nghal. Bawrsap hmalaknain Company hian he laia hnathawk turin JCB pakhat an tir a, hna a tan nghal a. Bawrsap hian kawng siama, leivung paih fai bawkturin Hitachi 2 leh JCB 1 a ngaih thu NHIDCL leh Contractor te hi a hrilh a ni.

Khawzawl Bawrsap Pu K. Lalrohlua chuan kawng siam leh leivung tih fai a nih chhungin khawchhak lam atanga Aizawl pan tur leh Champhai lam pan tur lirtheite chu Khawzawl khawchhungah an tlan luh a ngaih dawn avangin lirthei kal velin harsatna an tawh loh nan kalna tur kawng kawhhmuhna tar turin Khawzawl SP a hrilh nghal a. Bawrsap hian he lai kawng paltlangtu mipuite hriatthiamna a ngen bawkturin a ni.

Sapsakei Lamlian (Loch Road) hi Mizoram khawchhak lama lamlian upa ber a ni a. Aizawl khawpui duangtu British Army Officer Captain Loch-a'n Aizawl - Tuisenhar (Khawzawl) – Champhai - Falam (Myanmar) inkalpawhna tura a lo sial a ni. Khawzawl Vengthar atanga kawng kal hi NH-06 an laihna lamah Contractor te hian an tichhia a. Kum hnih liam ta atang khan siam tha tura vawi tam ngen an nih hnuah pawh chhuanlam eng emaw an nei zel a, Khawzawl Vengthar khawtlangin he kawng siam hnatlang hi an thawkturin a ni.

&lt;&gt;&lt;&gt;&lt;&gt;

ASF

Tun hnai, African Swine Fever avanga vawk thi tawh zat vawiin thlenga chhinchhiah danin 816 a tling tawh a, vawk 1018 suat a ni tawh bawkturin a ni.

Animal Husbandry & Veterinary department chhinchhiah danin, vawiin khan Dulte-ah vawk 3, Chhingchhip-ah vawk 3 an thi a, ASF darh zel tur ven nan hian vawiin khan vawk suat a ni a – Chhingchhip-ah 3, Khumtung-ah 4 suat a ni.

&lt;&gt;&lt;&gt;&lt;&gt;

### GOVT KHAWZAWL SCHOOL

Govt. Khawzawl High School chuan lehkhaw thiam sawrkar hna hmuhloh avanga harsatna sutkian nan National Education Policy hnuaiah kum 2019 atang khan Vocational Education chu uar takin an kalpui a, he course hnuaiah hian sector pahnih Automobile leh Apparel (Embroidery) te hawn niin zirlaiten an hlawkpui hle ni a hriat a ni.

Heng Vocational sector pahnih hnuaiah hian zirlaite motor khalh bakah motor chhe siam zirpui thin an ni a. Mipa zirlai tam zawk ten motor khalh hi an thiam tawh a, hmeichhe zirlaite tan pawh driving class siam sak niin an hlawkpui hle ni a hriat a ni.

Hmeichhe zirlaite hi puanthui zirtir tel an ni a. Heng zirlai chhuakte hian an zirna an chawhlan hnuaiah sawrkar hna remchang hmu kher lo mahse an tan eizawna kawng a inhawng tha hle dawn niin an school Headmaster Pu H Lawmthanga chuan a sawi.

<><><>

### MISTIC TRAINING

Thianghlim zawka Bekang umdan leh Bioresource hausakna hmanga ram hmasawna thlen theih dan tur zirhona chu Mizoram Science, Technology & Innovation Council (MISTIC) leh BRIC-Institute of Bioresources and Sustainable Development ñangkawp chuan Aizawla IBSD laboratory-ah an buatsaih a.

He zirhona ni khatnaah hian Aizawl leh a chhehvela bekang umtute leh sumdawna atana hmang te hnenah mihringte tana ñangkai leh hlauhawm loh chi bacteria bacillus subtilis atanga bekang thianghlim siam dan training pek a ni a,

A ni hnihna Aijal Club-a neihah Vikshit Bharat hnuaiah Mizo ei leh in hrang hrang siam dan inhrilhhriatna seminar neih a ni a. Seminar hi Prof. Pulok K. Mukherjee, Director, BRIC-IBSD chuan kaihruaiin, kum 2017-ah India ram chu 'Developed Nation' zingah hlan kai tum mek a ni a, Mizoram pawh ñan mar ve pat a ngai dawn a ni a ti a. Ram hausaknate hi a leilung mawina leh ñatna tichhe lova uluk taka hman ñangkai a ñul thu a sawi bawk.

MISTIC Chief Scientific Officer Pu H. Lalsawmliana pawhin Mizo chawhmeh um chi zinga pathum - bekangum, saum leh aium te chu zirchian mek a nih thu tarlangin, State pawn leh India ram pawn thlenga thawnchhuah a nghahlelhawm thu a sawi.

He seminar-ah hian Scientific Institution hrang hrang atanga mi thiamte, BRIC-IBSD atangin Dr. Pardeep K. Bhardwaj, Dr. Jitendra K. Shukla, Dr. K. Jeyaram te, MISTIC atangin Dr. Lalchandami Tochwawng te, Mizoram University atangin Prof. Rambir Singh leh Bamboo Research Center atangin Shri Sandeep Yadav te chuan kalkhawmte an zirtir a ni. He zirhona hi entrepreneur te, bekang umtute, research scholar te leh zirlai bakah Sorkar Department hrang hrang atangin an chhim a ni.

<><><>

### LIDAR

Champhai District Dungtlang leh a chhehvela Pi Pu sulhnu zirchiang turin êng-zung kahna LiDAR hman a ni a, .

Nimin khan Art & Culture department leh Mizoram Remote Sensing Application Centre, Science & Technology te chuan Dungtlang-a, khaw hmun hlui leh a chhehvel ram te, Aerial Survey, Light Detection and Ranging (LiDAR) hmangin an enfiyah a, he survey hian a tum ber chu vansang atanga heng lai hmuna Pi pu sulhnu, ngaw leh hnim kar a inthup te awlsam zawka zawn hmuh a zirchian a ni.

Hmanlai lungphun, in hmun hlui, lungdawh leh thildangte hi hnim pik tak takin a hlah thin avangin hmuh leh zawncchuah an har hle a. He LiDAR technology hian thing hnah leh hnim buk te engemaw chen a chhun tlang theih avangin beiseina sang tak nen he hna hi thawh a ni.

Study team hi Pu C.Vanlalengkima, Scientist leh Pu Vanlalhuma Singson, Archaeologist ten an ho a ni.

<><><>

### ENVIRONMENT

Kohhran pali awmna BCM Hnahthial Pastor Bial, Thalai Kristian Pawl (TKP) leh District Urban Development & Poverty Alleviation (DUDO) tang ho chuan vawiin khan Environment Humhalh Hnatlang an thawk a, he hunah hian Hnahthial khawpui tui tlan Tuichang lui fintu luikawr thenfai hna an thawk a ni.

Hnatlang thawk turte hi Nauhruaikawn Bazarah chhuak khawmin hunserh hman a ni a, Hnahthiala cham mek South Tuipui Bialtu MLA Pu Jeje Lalpekhlua pawh a tel a ni.

Hnatlang hi group li-ah inthenin Tui hnai lui kawr, Thingpui huan lui kawr, Pu Dapa vau lui kawr leh Tui hla lui kawr te an thian fai a, an vaiin TKP member 113 an thawk chhuak a ni.

<><><>

### EVERESTER

Mizo zinga Mount Everest tlang lawn chhuak hmasa ber Pu David Zohmangaiha thuamnaw leh bungraw thenkhat chu Kolasib Diakkawn Branch YMA Museum a dah a ni dawn a,

Mt Everester David Zohmangaiha hian Mount Everest a lawn chhuah tuma a thuamnaw leh hmanraw thenkhat te a hlan tih Diakkawn Branch YMA President Pu Joseph C. Lalhmangaihzuala chuan a sawi a, tuna a pek te hi a pek hmasak ber anih thu leh Mount Everest a lawn chhuah ni May ni 18 ah kum tin midang tana thil tha ti-a thisen a pek thin thu a sawi a ni.

Pu Zohmangaiha chuan, Mt.Everest lawn chhuak turin tum thum inthumna thlak a ngaih thu sawiin, tuna Diakkawn YMA Museum a dah tura a pek tak te hi tlang chhip thlen hma Metre 5000-a sang a lawn laia a thuamnaw hak anih thu a sawi.

Khawvela Tlang sang ber, Mizote zinga lawn chhuak hmasa ber ni tur hian May ni 18, 2013 zing dar 5:30 khan Mount Everest- metre 8848 a sang chu Pu David Zohmangaih hian a lawn chhuak ani.

Pu David Zohmangaih hi a nupui Pi Lalrinchhungi leh a fate 4 nen Aizawl Republic Mual Veng ah an khawsa mek a, thuamnaw leh bungrua inhlanna ah hian Pu David Zohmangaiha hi Zotrek Adventure Club member te chuan tawiaawmin, programme hman zawh ah Kolasib District Hospital Blood Bank-ah a mamawh apiangte hman atan thisen an pe nghal a ni.

<><><>

### 5<sup>TH</sup> PHASE LS ELECTION

Lok Sabha inthlanpui thawh ngana atana campaign chu vawiin tlai khan a tawp a. State paruk leh Union Territory pahniha Lok Sabha bial 49 ah Thawhtanni khian vote thlak a ni ang.

Vawiin campaign tawp niah political party tin hruaitu lawkte theihtawpin an campaign a. Prime Minister Narendra Modia chuan vawiin khan Haryana-a hmun hniha kawngzawhah thu a sawi a. Sonipat-a Ambala Ground leh Gohana ah te hun a hmang a ni.

Hetihlai hian Congress hruaitu Rahul Gandhi chuan vawiin khan Uttar Pradesh a Barabanki Lok Sabha bialah campaign-in hun a hmang bawka a ni.

EXTERNAL AFFAIRS MINISTRY

Kyrgystan khawpui Bishkek-ah ramdangmite bituma mipui tharum thawhna thlen avangin India chuan zirlaite fimkhura mahni inchhunga tawmim turin a chah. Sawrkar laipui chuan Bishkek-a Indian zirlaite chu an himna tur ngaihtuah anih thu sawiin External Affairs Minister Dr. Jaishankar-a chuan thilthleng mek chu an thlithlai reng a ti a. Tun dinhmunah boruak a dai deuh tawh nia sawiin zirlaite chu Indian embassy be pawp reng turin a chah a ni.

Bishtek ah hian tunhnaiah ramdang mite chung a hleilenna a thleng tam hle a. Pakistani zirlai mi pali thah an nih bakah midang engemawzatin hliam an tuar a. May ni 13-a hostel pakhata inhmuhthiamlohna thleng avanga intan niin Pakistani zirlaiten he buaina hi an ti punlun nia hriat a ni.

<><><>

IMEEC

India leh UAE sawrkar hotuluten India-Middle East-Europe Corridor (IMEEC) chungchanga inbiak vawikhatna an zo fel. India leh UAE te hian thla thum kalta khan IMEEC siam tura inremna hi an ziak tawh a. He inbiaknaah hian India lam aiawhte hi Union Ministry of Shipping, Ports & Waterways, Ministry of Commerce and Industry, Central Board of Excise and Customs leh Deendayal Upadhyay Port, Kandla atangtein official an kal a. May ni 15-17 chung khan UAE-a lawng chawlhna hrang hrang an tlawh kual bawk a ni..

<><><>